
یوہ آکا شوانی جموں ہے عبدالرحمن شاہین تیں خبر سُنو۔

Encounter

وادی کشمیر مانہ کل سلامتی دستاں تے دہشت گرداں بشکا ر ہوا دو بکھ بکھ ٹاکراں مانہ 3 دہشت گرد ہلاک ہو گیا ہیں۔ دہشت گرداں غی موجو دگی با رے اطلاعات ملن غے بعد سلامتی دستاں غی سانجی ٹیماں غی طرفوں ان دہشت گرداں نانہ پکڑن غی خاطر کی گئی کپیرہ بندیاں غے دوران ہوا ٹاکراں مانہ یہ دہشت گرد ماریا گیا ہیں۔ آکاشوانی نیوز سنگ گل کرتاں واں کشمیر غا آئی جی پی وی کے وردی نے اس گل غی توثیق کی ہے۔ جے عثمان المعروف چھوٹا ولید ناں غو لشکر طیبہ غو اک بڑو دہشت گرد کمانڈر سرینگر غا خانیار علاقہ مانہ سلامتی دستاں سنگ ہوا ٹاکرا مانہ ہلاک ہو گیا ہے۔ اس دہشت گرد غو تعلق پاکستان سنگ دسیو گیا ہے۔ یوہ دہشت گرد خاصا عرصہ تیں وادی کشمیر مانہ دہشت گردی غا بکھ بکھ سرگرمیاں مانہ ملوث رہیو ہے۔ اس جھڑپ غے دوران سلامتی دستاں غا 4 جوان زخمی وی ہوا ہیں۔ جن مانہ جموں کشمیر پولیس غا 2 جد کہ سی آر پی ایف غا وی 2 جوان شامل ہیں۔ زخمی جواناں نانہ ہسپتال داخل کرا دتو گیا ہے۔ آئی جی پی موصوف نے مزید جانکاری دیتاں واں دسیو جے اسے طرح غا اک ہور ٹاکرہ مانہ ضلع اننت ناگ غا اُرنو ککرناگ مانہ کل پیشی بعد دو دہشت گرد ہلاک ہو گیا ہیں۔ اسے دوران دسیو گیا ہے جے شمالی کشمیر غا پانار، پانڈی پورہ مانہ وی سلامتی دستاں نانہ گجھ مشکوک افراد غی نقل و حرکت غو پتو چلیو۔ جت دہشت گرداں نے سلامتی دستاں ور آندھا دھند گولی با ری کی تے فر کہنا جنگل غو فائدو چاتاں واں فرار ہو گیا۔ اس واقع غے بعد سلامتی دستاں نے دہشت گرداں غی تلاش مانہ اک بڑی کاروائی شروع کی ہے۔

ISRO

بھارتی خلائی تحقیقی تنظیم اِسرو نے لداخ غا لہیہ غا مقام ور پہلو خلائی مشن شروع کیو ہے۔ جت یاہ خلائی ایجنسی بین سیاراتی مصنوعی زندگی غو تجربو کرے گی۔ اس مشن غا آغاز سنگ بھارت غی طرفوں مستقبل قریب مانہ چن ور انسان نانہ روانہ کرن غا منصوبہ غو پتو چلے۔ اِس خلائی تحقیقی مشن غو مقصد زمینی سطح ور شدید ماحولیاتی مشابہت غو تجربو کرنو ہے۔ تانجے خلائی پرواز با رے تحقیق غا سلسلہ مانہ ممکنہ مشکلات ور قابو پان مانہ مدد مل سکے۔ لداخ نانہ اس غا جغرافیائی صورتحال غی وجہ نال چنیو گیا ہے۔ جت خشک اور ٹھنڈو موسم، بے حد اُچا پہاڑ تے دوجا علاقائیں کا فی علیحدگی پائی جائے۔ جس غی مشابہت کا فی حد تک چن غی سطح سنگ پائی جائے۔

Dy CM Jhiri Mela

آئندہ 14 نومبر تیں 24 نومبر توڑی چلن آلا چڑی میلہ غی تیاریاں غے پیش نظر کل نائب وزیر اعلیٰ سریندر کمار چودھری نے اک اہم میٹنگ غے دوران بولتاں واں کہیو ہے جے باوا چٹو غی زندگی تے امن غی قربانی غی یاد خطہ غا ہر کسان غا دل مانہ موجو دہے۔ تے وے اُن غی قربانی غی بڑی قدر کریں۔ اس میلہ مانہ 20 غے قریب لوکاں غی موجو دگی غی امید کی جا رہی ہے۔ اس راہ یوہ میلو سرکاری محکماں غی طرفوں گرائیں آبا دیاں غی بھلائی بہتری واسطے جاری کی گئیں اسکیمان نانہ عملان غو موقعو وی میسر کرے۔ میٹنگ غے دوران نائب وزیر اعلیٰ نے زور پایو جے چڑی غو یوہ میلو نہ چھڑو مقامی ذراعت بلکہ جموں گا ثقافتی ورثہ غو وی مظہر ہے۔ انہاں نے اس موقع و ر بولتاں واں کہیو جے میلہ مانہ آبا لوکاں نانہ جدید ذراعت با رے طریقے کا ر، دستیاب بیجاں تے ہیاں با رے معلومات مہیا کران غی لوڑ ہے۔ تے ہدایت کی جے اس خاطر کوششاں مانہ باہدو کیو جائے۔ جناب چودھری غو کہنو تھو جے انتظامیہ غریب تے چھوٹا کسانان نانہ سہولت دین غی پابند ہے۔ انہاں نے یقین دوايو جے میلہ مانہ شریک ہون آلا افراد نانہ بہتر سہولیات تے حفاظتی انتظامات مہیا کرایا جائیں۔

DGPC Dy CM

ضلع گوردوارہ پر بندک کمیٹی جموں نے تنظیم غا صدر رنجیت سنگھ توہرا غی قیادت مانہ کل نائب وزیر اعلیٰ سریندر کمار چودھری سنگ ملاقات کی تے اُن نانہ سیکھ طبقہ نانہ در پیش بکھ بکھ مسائل تے مشکلات بارے جانکاری دتی۔ وفد نے سیکھ طبقہ غی بہبود تے ترقی غا بکھ بکھ کماں با رے نائب وزیر اعلیٰ تیں مانگ کی۔ انہاں نے سیکھ طبقہ نانہ درپیش ثقافتی، مذہبی، سماجی تے اقتصادی مسائل بارے تفصیل سنگ نائب وزیر اعلیٰ نانہ خاکو پیش کیو۔ نائب وزیر اعلیٰ نے وفد نانہ سنجیدگی سنگ سنیو۔ تے اُن غا مسائل تے مشکلات غا تولاں آزالہ غو یقین دوايو۔ انہاں نے طبقہ غا مسائل با رے گل بات تے صلاح مشورہ نانہ آئندہ وی جاری رکھن غو عظم کیو۔

Animal Husbandry Ramban

محکمہ انیمل ہسپتڈری رام بن دودھ غی پیداوار بدھان تے مویشی پالن نانہ فائدہ مند بنان غا سلسلہ مانہ لگاتار اقدامات کر رہیو ہے۔ ڈیری فارمینگ تے پولٹری غا سلسلہ مانہ کیا جان آلا اک نمایاں اقدام غے تحت قرضہ مہیا کرایا جا رہیا ہیں تانجے ضلع مانہ مربوط ڈیری ترقیاتی سکیمان یعنی آئی ڈی ڈی ایس نانہ فروغ دتو جا سکے۔ یہ اقدامات خصوصی طور و ر رام بن ضلع مانہ پولٹری غی صنعت نانہ باہدو دین غی خاطر کیا جا رہیا ہیں۔ پولٹری فارم بنان غی خاطر 1 لکھ روپیاں غی سبسڈی مہیا کرائی جا رہی ہے۔ اس توں علاوہ 4 خود کار دودھ جمع کرن غا یونٹ، اے ایم سی یو قائم کیا گیا ہیں۔ جد کہ 2 ہور زیر تعمیر ہیں۔ یہ یونٹ 100 فیصدی سبسڈی غا پروسس سنگ قائم کیا جا رہیا ہیں۔ اس توں علاوہ گٹرو کرن آلی مشیناں و ر وی 50 فیصدی سبسڈی مہیا کرائی جا رہی ہے۔

اس غے نال ہی خبراں غو یوہ بلیٹن ختم ہوؤ۔